

雙湖先生文集

雙湖先生文集卷之二

論

周易五贊總論

五贊大要皆教人以象占之學首篇原奇偶之象次篇述作者之旨三篇明筮以發其占四篇稽類以考其象五篇以警學名欲人讀易之際常如卜筮之臨假象辭以爲儀則而終趨於吉是又會象占而一之者也朱子嘗曰某解易只作卜筮之書今五贊皆以象占示教其旨深矣

文王作爻辭辯

馮厚齋解明夷六五箕子之明夷云箕字蜀本作其字此繼統而當明傷之時之象其指大君當明傷之時而傳之子則其子亦爲明夷矣又謂文王作爻辭移置君象於上六以初登於天後入於地况明夷之主六五在下而承之明夷之主之子之象也子繼明夷之治利在於貞明不可以復夷也後世以其爲箕遂附會於文王與紂事甚至以爻辭爲周公作而非文王蓋箕子之囚奴在文王羑里之後方演易時箕

子之明未夷也李隆山溪然其說謂班馬只言文王  
演卦又曰人更三聖世歷三古止言包羲文王孔子  
未嘗及周公也馬融陸績王肅姚信等始有周公作  
爻辭之說絕不經見孔穎達始引韓宣子見易象與  
魯春秋而知周公之德與周之所以王爲周公爻辭  
之証審爾謂周公作爻辭可也而春秋又將屬之周  
公乎此論確矣愚謂以爻辭爲文王作固自有據况  
夫子唯曰易之興也當文王與紂之事是故其辭危  
言辭只說文王未嘗及周公則所謂辭者安知非卦

父之辭耶愚固已疑之矣然考箕子囚奴誠在文王  
美里之後文王決無預言之理而隨之王用享於西  
山升之王用享於岐山又誠類太王文王之事夏商  
之王未有享於岐山者朱子解作卜祭山川之義諸  
侯祭境內山川亦正二王爲侯時事也以此觀之則  
爻辭未必果文王所作故謂之作於周公韓宣子見  
易象之言誠可証也李隆山辯魯春秋之說蓋自不  
曉其義宣子本意自說見易象則知周公之德見魯  
春秋則知周之所以王也周之王猶能爲春秋之時

之主義甚昭然若厚齋因蜀本其字之誤盡疑天下之本反改而從之猶有所未可漢趙賓正蜀人解明夷六五箕子爲荻茲則蜀本箕字初未嘗作其字况厚齋謂父當暗世而傳子故其子亦爲明夷歷考前古惟堯舜老而舜禹攝此乃明德相繼夏商之王未見父在而子立者惟桀紂可當明夷之主其肯遽傳之子乎此馮氏見後世北齊末主前宋徽欽而有是說謂文王作爻辭乃取此義乎爻辭稱帝乙箕子自是一例况明夷箕子之稱又自有夫子彖傳爲之証

據彖傳利艱貞箕子以之之辭與爻辭箕子之明夷  
利貞之辭正相應焉可附會蜀本一字之誤以証爻  
辭爲非周公作哉愚固不能無辯以祛讀者之惑

易文言辯

或疑文言非夫子作蓋以第一節與穆姜之言不異  
本義以爲疑古有此語穆姜稱之夫子亦有取焉得  
之矣然猶以爲疑古有之初亦未嘗質言之者蓋嘗  
妄論之曰若果如或疑則何止文言雖大象亦謂之  
非夫子作可也何者八卦取象雖多而其要則天地

山澤雷風木火雲泉雨火電日今考文王彖辭自震  
雷之外離雖取象於日而未嘗象火周公爻辭自巽  
木離日之外雖三取雨象亦未嘗專取水他則未之  
聞焉至夫子翼易始列八卦之象而六十四卦大象  
始各有定屬如是則夫子以前凡引易者不當有同  
焉可也而左傳所載卜筮之辭多取八物之象此皆  
在夫子之前而引易以占者如此若然則大象亦謂  
之非夫子作可也謂夫子以前原有可也謂夫子作  
者非也今欲知其果作於夫子而無疑其將何說以



證嘗反復思之而得其說春秋夫子筆削之經也左傳春秋經傳也夫子繫易實在作春秋之前絕筆於獲麟蓋不特春秋之絕筆亦諸經之絕筆也左氏生夫子之後尊信夫子始爲之傳由此觀之謂易有取於左傳乎抑左傳有取於易也又況左傳所載當時語其事則彷彿其文多出於自爲如呂相絕秦書今觀其文法要皆左氏之筆而穆姜爲人淫慝迷亂安得自知其過而有此正大之言如棄位而姦等語決知非出於其口如是則四德之說是左氏本文言之

語作爲穆姜之言明矣至若占辭多取諸八物亦非當時史氏語實左氏本夫子大象以文之一時不暇詳察遽以夫子所作之象爲夫子以前之人之辭也又如國語載司空季子爲晉文公占得國之辭又不特取諸八物且有及於勞坎卦之說如是則并與說卦亦謂之非夫子作可乎大抵居今之世讀古聖人書只當以經証經不當以傳証經若經有可疑他經無証闕之可也何況夫子十翼其目可數今乃因傳文反致疑於經可乎愚以是謂文言大象真夫子作

而左氏所引不足爲惑故不得不辯

讀詩履帝武辯

履帝武敏歆按孔氏曰左傳昭元年曰邕姜方震哀元年曰后緡方震皆謂有身爲震也愚觀姜嫄誕后稷之事毛傳初無異說不過謂姜嫄爲帝嚳元妃姜嫄從帝嚳禋祀郊禩履帝跡而行將事齊敏神歆其祀美人之福遂止其身於是震動夙然而覺生子而長養之是爲后稷其說甚正至鄭氏乃有大神跡之說并改敏字爲拇字謂姜嫄履大跡不徧履其拇指

之虞遂歆歆然如有人道之感已而有身鄭氏出於  
毛氏之後不知何以有是說也嚴氏謂列子異端司  
馬遷好奇鄭氏信讖緯而爲是說爾故歐陽氏演辯  
之云秦漢學者喜爲異說高辛四妃皆以神異而生  
子蓋堯有盛德稷契後世皆王天下數百年學者喜  
爲之稱述欲神其事故務爲之說洪駒父亦云堯舜  
與人同爾血氣之類父施母生耳聽目視是聖智愚  
不肖之所同也何必有恢怪詭誕之事然後爲聖且  
賢哉不特此也天命玄鳥降而生商歐公意亦不過

謂高辛次妃簡狄當佐鳥之辰祈郊禱而生契生契所以生商也未必有吞鳥卵之事其辯尤詳而朱夫子猶信鄭氏云者夫豈好怪哉亦以聖人之生異於凡人耳而集傳於巨跡之說先儒或頗疑之歐公不信祥瑞又言於語錄愚故詳及之以備叅攷云

### 封建罷縣論

聖人理天下以萬物各得其所爲極至封建也者帝王所以順天理承人心公天下之大端大本也罷縣也者霸世暴君之所以縱人欲悖天道私一身之大

孽大賊也分天下有德有功者以地而不敢以天下  
自私於是有百里七十里五十里邦國之制焉於是  
有君朝卿大聘大夫小聘王巡狩侯述職之禮樂制  
度焉於是有千雉百雉三之一五之一高城深池焉  
於是有井邑丘甸羆縣之夫數焉於是有十乘百乘  
千乘萬乘之車數焉於是有伍兩卒旅師軍之制焉  
於是有卿大夫司徒樂正取士之法焉邦國之制廢  
而羆縣之制作矣羆縣之制作而世襲之制亡矣世  
襲之制亡而數易之弊生矣數易之弊生而民無定

志矣巡狩述職之禮廢則上下之情不通考文案而不究事實信文案而不信仁賢其弊有不可勝言者矣城池之制廢而禁禦暴客威服四夷之法亡矣夫家之法廢而民數不可詳矣民數不可詳而車乘不可出矣車乘不可出而軍師不隱於農矣軍師不隱於農坐食者衆而公私困窮矣世儒不知王政之本反以亡秦爲可法所謂明君良臣者亦未免以天下自私無意於裁成輔相使萬物各得其所所以歷千五百餘歲未有能復之者也聖人制四海之命法天而

不私盡利而不曲防分天下之地以爲萬國而與英才共焉非後世擅天下者以大制小以強制弱之謀也誠盡利而已矣是以虞夏商周傳之長久皆千餘歲論興廢則均有焉語滅絕則至暴秦罷縣天下然後極也自秦滅先王之制海內蕩然無有根本之固有今世王天下而繼世無立錐之地者有今年貴爲天子而明年欲爲匹夫不可得者天子尙然況其下者乎物有其根則常而靜安而久常靜安久則理得其終物遂其性封建者政之有根者也故上下辨民



志定教化行風俗美理之易治亂之難亡扶之易興  
亡之難滅魏縣反是

漢高帝不事詩書論

詩書所載皆治平之迹綱常之要也創業之君立法  
垂統尤所當注意焉世稱高祖英明豁達而不事詩  
書之弊不可勝紀其入關除秦苛法是矣過魯太牢  
祀孔子是矣說聽三老名尊四皓禮墓田橫而義釋  
季布亦皆是矣非其天資之高至是乎然挾書之律  
至惠帝而始除妖言之令至文帝而始去疑獄之讞

至景帝而始行博士之官茂異之詔至武帝而始置  
且下天石祿渠五經同異至宣帝而始開且講教太  
子之法始見於賈誼之策立太學之事始見於仲舒  
之對而分封推恩乃見王父偃之書治體之不立非  
不事詩書不能稽古使然歟不惟是也分羹擁篲寵  
廢奪嫡而父子之親何在制產誇仲憂羹侯姪而兄  
弟之愛何在族韓醢越功勲之鬼不祀則君臣之義  
未聞也不能制呂而私以嬖戚則夫婦之道未聞也  
背鴻溝之約負帶礪之盟而何有朋友之信使以詩

書講學爲輔天資之美綱常蕩滅奚至是哉惟其不  
事詩書則貽謀無術故惠帝以母后而棄國事篤小  
信而不知大義文帝制度禮樂則謙讓而未遑景帝  
率多慙德而稽古禮文之事多闕武帝紛紛制作而  
海內虛耗宣帝刑名繩下以不任德教爲漢家制度  
此皆不垂統之所致也原帝無意於詩書者起於不  
好儒之故其不好儒則天資亦不得爲純美也雖然  
抑亦當時之儒有以累之當時非無儒也帝以兩生  
四皓拘儒不屈申公穆生癯儒不招彼所見者叔孫

通之陋儒陸賈之鄙儒隋何之腐儒與酈食其之賢儒耳德不足以尊主庇民道不足以謀王安國安能動帝而帝不解而嫚罵也哉使大儒如董子通儒如賈誼早立於朝帝能不爲之禮重乎僅一張良黃老其學儒者氣象帝尙師之儒而如是好之何如此帝所以負不好儒之名也此帝所以負不事詩書之責也此帝所以負天資之美而漢其治也

毛延壽論一

漢元帝以宮人多乃命毛延壽圖形以僉當意延壽

見王嬙字昭君者色甚美故抑其貌旣而昭君適胡而帝視其光彩炫人教延壽後世憐昭君而惡延壽快元帝之追愚則以爲不然甚矣色之能傾人國也妹喜亡夏妲己亡殷褒姒亡周安知昭君不能亡漢邪大抵女色見可愛則欲心熾武墾不接高宗之目則不能亂唐太真不暱明皇之愛則未必奔蜀延壽不使昭君得寵於元帝亦陰有存漢之力也去讒遠色賤貨而貴德所以勸賢也元帝節儉不耆貨利固也恭顯讒佞顯擅於外而望之更生堪猛輩俱不得

其死又可艷此一蟲惑於中哉古者諫無官雖盲聵  
膳夫之賤輪扁麥丘之疏新城壺關之老皆得以禁  
邪欲然以言諫者不憚費辭而利害之未保以心諫  
者默銷潛鑠其欲止禍於無形禦亂於未起而功力  
猶倍延壽寓心諫之一道亦良畫工也惜乎受祿自  
私而意不在君又安知非恭顯之誣乎卽傳猶譖之  
何難於一畫工也昔田文聘楚楚王遺之象床公孫  
戊受楚寶劍以諫文聽之戊足高志揚文名問而戊  
以寶對文書門板曰有能正文之過私得寶於外者

疾入諫戍懷詐誕之心而有益於公事文猶用之何  
元帝而孟嘗君之不若哉延壽之受賂與否不足論  
也色之在女猶德之在賢也恭顯之陷望之猶延壽  
之媼昭君也延壽之欺帝知殺之恭顯之欺僅得其  
免冠謝而已所謂吾未見好德如好色者也吾聞齊  
人歸女樂而魯政衰薺之謀臣種蠡遣西施而吳遂  
滅以昭君婚單于其亦嫁禍於胡也帝何靳之而殺  
延壽乎信讒好色天下未有不亂者京房以論石顯  
誅陳咸以論石顯髡去讒也延壽以蔽昭君死遠色

也以畫工而得與儒臣遊地下死亦何恨

張公藝書忍字百餘篇

古之田夫野叟蒨園牧圉苟逢機會亦因事納忠而  
諷諭人主如郭父麥丘之人新城壺關之老皆嘗進  
言以感悟上心唐高宗過壽張幸張公藝之宅問所  
以能九世同居之故正布衣諷切時也公藝盡告之  
曰清心寡欲以修厥躬齊家之本也悖倫厚理以正  
風化齊家之道也內外有序而尊卑弗紊齊家之效  
也得是則有孚威如而家可久失是則牝雞司晨而



家道索矣惜乎公藝見不及此噤無一語特書忍字  
百餘以進吾意高宗稱善賜帛之後將以忍爲忍心  
之忍耶則忍蒸父妾忍棄願命者必以爲是而不知  
父子之道睽忍殺諫臣忍戮功臣者必以爲是而不  
知君臣之義闕忍廢皇后忍黜淑妃者亦皆以爲是  
而不知夫婦之情乖心一忍而三綱損又何爲而憎  
忍心之事滿百也哉將以忍爲舍忍之忍耶自武后  
之立專作威福凡有所爲動爲所制忍矣政無大小  
皆欲預聞忍矣天下大權悉歸中宮黜陟生殺決於

其口帝惟拱手又無何而不忍矣一日萬幾其忍者  
萬豈勞再見百忍也哉且含忍太過必務姑息而恩  
多掩義若曲意忍爲則傷恩害義而尤爲不可皆非  
治家之道容忍而誠足以濟事也則點籌后側唾面  
自乾者爲聖賢矣子弟之悖逆可忍之乎妻妾之淫  
亂可忍之乎果此百字而誠有理也大學之論齊家  
易辭之繫家人亦詳矣何無一忍字之及廼待公藝  
之手而連書耶孔子論事則曰是可忍也孰不可忍  
也孟子教人以不忍人之心行不忍人之政皆以忍

爲不可也使忍爲美德則聖賢先此樸老而書之惟其不耆於學啓君之機旣失治國之道罔聞不可爲法明矣其所以九世同居者其祖父自有成法若公藝者日用而不知耳意者以忍自守亂張氏家法者必公藝也何也但聞其九世不聞其十世必自公藝而止也後世有作對繫辭立圖示箴而衍其意莫知其非者余故作論以辯之

記

萬八公建天井山記

天井山在大好山水州西南百八十里與閬峯接麓而黃山三十六峯支脉也拔地倚天其山窪中而隆外有類於井故名天井爰自鰲以來雖近在人境而神局鬼鑰瘦於荆榛茆伐雖有是山誰有是山吾宗道存家於其下妙得混元雷霆法袖物日不遑給歲在丁酉孟秋若有神人指授亟命僕夫具畚鍤廼廼荆廼懇廼闢於是端倪軒豁層巒拱

顧風雨在下雷砰電射在指顧閒遂爲壇於上結尾  
數楹爲嚴事所白雲爲垣碧山爲屏光春好風嘉葩  
奇卉隱映後先隆冬盛寒怪松老栢以茂以說隔人  
世之囂塵貫天心之虛靜以是神亦靈而人亦蒙福  
州太守順齋翟公嘉其有功是邦大書濟度二字爲  
斯壇扁道存一日以記屬余余惟雷以春秋二分爲  
發聲收聲之候各百八十日爲萬物出入之機顯於  
有聲妙於無迹此其神也而何必壇且夫丹楹刻桷  
山節藻梲自以爲至矣神豈眷戀是哉壇且非所計

而况於記乎道存遽指心而訓予曰壇者其所寓而  
吾方寸中乃非壇之壇也此之呼吸語默卽彼之陰  
陽動靜此之喜怒恻舒卽彼之驚遠懼邇無往而非  
此心之妙用又况神道設教無爲而爲凡水旱疾疫  
必禱必應其有儋石無儲楮財莫備必自捐貲俾瘳  
乃已毋一毫責報毋驕氣德色幾微見顏面毋沽名  
毋要譽凡此者吾勉勉行之今此心幾與神爲一矣  
豈專事斯壇云乎哉且吾聞魯城南有壇墠樹木爲  
祭天禱雨處壇亦古所尙則夫事雷神而爲之壇誰

曰不可必記諸無落吾事余曰心信神明之舍而無  
爲而爲又有合於先賢所謂得天理之公者予何得  
儒者之論若是哉而予又奚言予敬書此以貽之道  
存名泰和嘗習儒業家饒於財是舉也厥父宗周厥  
弟泰初與其族之好道里之同志者皆割膏腴施泉  
其開命道上胡彌遠住持辦香祝國保民而其家尊  
亦遊息焚香遂爲開山第一祖矣其法師玉谿  
信玉谿師程拙翁程師雷時中雷師真人路大安可  
謂遠有淵源者矣至大辛亥宗人胡一桂是爲記

銘

厚德堂銘

人之爲人以有此心心之爲心以有此仁仁者必厚  
惟在所存一以貫之痼瘵乃身爾忱不屬痿痺莫伸  
我觀醫者茲道以明仁與不仁於此焉分君子過厚  
藹然如春小人過薄殘忍寡恩薄則易疎厚則易親  
天地一家孰分比隣我愛斯堂以厚德銘循名踐實  
薄俗可敦窮則良醫利物濟人達則良相致君澤民  
匪龍護符海波沄沄匪虎賣杏生意肫肫高下急赴



無問富貧口不言錢神明實臨以此方寸施於子孫  
我作斯銘君其書紳

雙湖先生文集卷之三

書

上謝疊山先生求作翼傳序書

二月六日新安學生鄉貢進士胡一桂謹熏沐裁書  
百拜獻於提刑殿講疊山先生閣下

某

嘗讀周元公

易通有曰天地閒至尊者道至貴者德至難得者人  
人而至難得者道德有於身而已夫所謂道德者何  
也其綱有三其倫有五原於天設於地品節於聖人  
通行於千萬世由乎此則安不由乎此則危由乎此

則爲人不由乎此則爲禽獸斷斷其不易之論也然  
嘗怪夫自開闢以來宇宙不知其幾變而所謂道德  
疑若爲之而俱變者冥冥之表蓋有天焉每於其交  
際之閒必生一二傑魁瑰偉之士以身任道德之寄  
把握扶植於不滅不壞之地夫天旣以道德重寄付  
託於其身謂宜愛之護之俾得優游適志以順乎其  
天顧乃不然或使之憂患困苦直至殺身而後可以  
成仁或拂亂其所爲使之饑寒流落瀕於萬死而不  
得死棲棲然寄隻身於遐陬僻壤閒而時俗富貴者

洋洋得志切齒吐罵以爲至愚至癡不通時變自陷  
於困窮所謂可憐不足恤者若是而望其把握扶植  
此道德於不滅不壞之地真不啻如一髮引千鈞之  
難何哉蓋天地閒萬形皆有敝惟理獨不朽是事固  
有囿於氣數之不得然而道德之理則實未嘗一  
息可變苟非其人亦不能以自行故必於是託然  
人品不一有盜名欺世者有慕名矯拂者有不能忍  
於饑寒而流涎富貴者有牢關固拒於其始而卒喪  
其節者有自度其才足以應世而姑守窮約者有初

之無力以自奮忽乘機而遽起者若是者皆不足以  
任道德之寄往往天亦嘗厭棄於此徒是以付託一  
二人於斯世而使之憂患困苦殺身以成仁行拂亂  
其所爲饑寒流落瀕於萬死而不得死如精金百煉  
曾不變其所守仁以爲己任死而後已者亦以其身  
不足愛而道德之爲可愛且將以愧天下之曾擔人  
爵食人祿者若此者是眞可以任道德之寄昌黎韓  
子所謂千萬世一人周子所謂道德有於身者是也  
遊五目盼八荒思得大人君子道德有於身者爲之

依歸舍先生其誰哉惟先生抱三光五岳之正氣負  
三綱五常之重任涉世於強仕之年秉撻於立朝之  
日一時權奸如虎豹九關磨牙搥毒而浩然之氣至  
大至剛以直養而無害曾不爲之撓屈居常抱膝林  
泉朗誦先生大雅之章想見人豪而雲泥懸絕無階  
趨拜茲者恭聞蟄神龍於九淵翔鳳凰於千仞儉德  
自持而爵祿不足以縻高尚自立而王侯不足以屈  
集蓉裳修初服而章甫逢掖變更之未嘗時蓮舟讀  
玉書而天祿石渠宗主之有屬斯文倚爲命脉衣冠

賴以綱維義夫節婦得所標表以益堅亂臣賊子有所觀望而羞愧遺德之興廢關係於先生之一身而把握扶植之責甚重而匪輕也故昔也危言危行人不得以議其奸今也危行言遜人亦莫得以議其脂韋梅福之於炎劉淵明之於司馬時不同而處亦異也嗚呼天地猶有憾粹乎先生之行終不能疵日月猶有蝕昭乎先生之心終不能蔽雷霆猶有伏烈哉先生之氣終不能遏此真所謂道德有於身而千萬世一人之人也稍有志於道德之士可不承下風而

望餘光哉某安定徵宗古歛士族蓋自鼻祖明經公

昌翼

以唐昭宗嫡子遇朱溫之難而寄姓於胡同光

乙酉叨中明經尚義不仕聚徒講道南唐職方舒雅

集賢院學士呂文仲謝泌皆師其門至八世兩伯祖

鉉銓

接武元豐之第而高伯祖昂政和間由辟雍第

太常與朱韋齋先生有同邑同年之好嘗過齋頭獲

觀先明經諸註疏謂當五季波靡獨能剖抉聖真漢

儒以來一人重爲嘆賞高祖溢紹興初分路省元復

收世科詩書之傳道德之脉四百餘年於此矣某五



六歲而讀父書十二三而能文十八而名登天府年少氣銳不但視功名如唾取粗亦爲有志於當世者夫何天池之翼未展而涸溪之翅已垂孟明之舟未焚而郊廓之鼎已易事蓋有大謬不然者我之爲我亦無復有志於斯世矣自比年以來天疾其軀仲車其聽庸人孺子莫或肯半指屈中夜以思默然領會意者造物仁愛之深故欲使爲無聞之人專心致志於學行之乎仁義之途游之乎道德之源無絕其源無迷其途而已乎環視其家圖書滿屋而紫陽夫子

之易又平日所臨尚伏讀家君啓蒙通釋吾易門庭  
既已獲入獨謂本義提綱振領而節目未詳於是又  
取語錄而附之纂集諸說開贅已意至若卦象之異  
同文言之疑義自漢儒以來千有餘年未有能灼知  
其說者 某 一旦豁然貫通若有陰相而默啓之於是  
作爲卦象圖說又作爲疑文言辯卦體之未有圖也  
而圖之十翼之未有論也而論之啓蒙本義有大功  
於天下後世而人莫知也又表而出之若此者豈務  
飾章繪句以爲能記事纂言之爲多哉亦以續我先

明經之淵源而挽承學之浸失况大之爲天地幽之  
爲鬼神明之爲君臣治亂別之爲賢邪進退於以立  
三才之道順性命之理盡事物之情通天下之故莫  
不畢脩於易於此乎有得焉亦庶乎身心收斂不致  
外馳而所謂至尊之道至貴之德由是而不失蓋亦  
自幸歲月之不虛度矣然左太冲三都賦固未嘗不  
爲奇偉之書使不遇皇甫謐爲之序亦何以信於時  
而聞於後哉今海內以先生爲道德之宗工人物之  
權衡某是以不遠千里往拜函丈求片言以爲之歸

敵倘微高名令譽傳之無窮施之罔極吾何幸乎易  
何幸惟先生進而教之實爲民士之至願予肩師嚴  
下情不勝戰慄俟命之至

雙湖先生文集卷之四

詩

應試期登

幸逢中選赴科場多少英豪望顯揚  
管取青雲生足下金榜題名返故鄉

遊鵝湖山

不辭風雨眺湖山景物繁華在目閒  
古載咏歌原不謬吾今登覽豈頽顏

咏繡水洲

撫時傷物惜名流縱目閒觀起夙愁觀此繡圍溪上  
水至今猶念岳公猷

往閩經雲幢菴

碧雲綠水發青缸脫俗升騰在此方西域江南皆淨  
土一菴故自號雲幢

題受禪臺

當年父子強吞劉自爲兒孫萬萬秋受禪臺還司馬  
事山陽後改作陳畱

玩易齋自咏

卜築傍林阿雙湖若鑑開一屋楊子宅半畝邵生窗  
地僻紅塵淨松高綠蔭多晝開簾不捲啼鳥隔牆歌

冬至寓建陽作

線日添漢宮書雲紀晉觀山家獨奚爲剛腸占易象  
幽人意欣然起在觀晴漢大化回初陽漫漫今已旦  
川泳有遊魚雲飛見翔鴈滯畱本何心永懷發孤嘆  
誠哉利攸往觀辭思過半

題譜

譜牒綿綿歷世傳焚香後世足怡然百年文獻家聲

舊幾度忠良事業先佩玉鳴金遺表在循詩執禮後  
人賢也知執守非容易囑付兒孫好勉旃

和鼻祖感興二韵

別却長安住僻村皇儲已作亂離人三公受託謨猷  
廣一脉能全福澤新便殿知機先奮翼彤庭脫穎未  
傷麟當時不悟存孤計必學無謀二世秦

其二

舉世爭趨名利場奈緣天運屬周堂山河自古多更  
變社稷從來有敗亡炎漢用謀成大業強秦無計失



咸陽唐朝風韵當陵替祖系雲仍勝帝王

遊薊溪興山寺次朱晦翁韵

高僧肯把利名違  
剎剌嶺巔擁翠圍  
舉首常瞻紅日近  
回頭迭見白雲飛  
或聽龍吟和虎嘯  
時聞鳥語與鶯啼  
鐘鳴漏盡渠舡睡  
疆鎖無干任適機

舉場二首

長憶當年舉子忙  
親承勸駕沐恩光  
工歌呦鹿今如昨  
臣拜杜鵑空斷腸  
龍去鼎湖悲寂寞  
鶴歸華表竟荒唐  
凭欄轉覺增惆悵  
默默無言問彼蒼

其二

家易相傳邇紫陽士林千載仰餘光名登甲子天恩  
渥道塲咸淳宋祚亡太白明經加羽翼武夷論學破  
荒唐陟丘絮酒恭申省風韻猶存草木香

邇三關頌績

閩越洪都界接隣三關名號至今存源溪隱險潛赤  
嶺嶺峻崎嶇作綠林楊將承恩親鎮撫群邪歛跡並  
離塵今時過績咸無碍交頌皇家樹大勲

武夷山秋夜同友翫月

天邊明月幾回圓此夕清輝更可憐影入蘆花飄素  
玉光搔桂葉簇金釧書齋照耀明如晝客館凝涼趣  
若仙料得今宵同詠者凭欄賡和不知眠

代友題秋扇

獨上青霄跨紫鸞手揮明月下雲端半彎素練霜風  
冷一幅芙蓉雪色寒細擬鳳頭生翡翠輕搖鳳尾動  
欄杆何當持向金門去十二瓊樓仔細看

謁嚴子陵祠有感

千載寰中幾釣臺桐江渭水兩徘徊先生獨愛羊裘

隱尙父原從熊夢來  
謾說客星凌帝座  
何如後乘載師臺  
兩公出處誰軒輊  
趨向從教着意猜

金陵元日

今年元日客途干  
細嚼梅花亦自妍  
玉曆已頒新月日  
金陵猶是舊山川  
煙花焰焰空眯眼  
紅紫紛紛盡比肩  
莫遣猿驚并鶴怨  
暮山繡水好春天

重陽

佳節清懽可得追  
壯懷未覺老垂垂  
紫萸何用囊經臂  
黃菊不妨英滿枝  
猿嘯忽思工部句  
龍沙嘆息簡

齋詩儒冠恨我知多少試倩天風爲一吹

冬至

太極才分動靜初人閒喜惡此焉殊  
姤初可忽方麗豕剝五俄驚已貫魚  
坤盡六爻當子半復回七日喜陽舒  
寰中一見天心妙吾道之回可易與

至日建中次季真韵

盡日勞勞煙雨裡此行誰識是耶非  
翩然芒屨相隨處正見梅花欲放時  
太極便堪窺易蘊黃鐘初可驗葭飛  
天心子半無移改細玩堯夫至日詩

除日次茶軒韵

歲事雖殘莫厭殘  
谷中守歲強追歡  
如今誰復秦淮恨  
舉世多知蜀道難  
且索梅花今夕笑  
旋哦桃句隔年看  
酒餘授易知東否  
未信當年何與寬

詞

社日 青玉案

年年社日停針線  
怎忍見雙飛燕  
今日江城春已半  
一身猶在亂山深處  
寂寞溪橋畔  
春衫着破憑誰換  
點點行行淚痕滿  
落日解鞍芳草岸  
花無人戴酒

無人勸醉也無人管

春思 失題名

秦樓東風裡燕子還來尋舊壘餘寒猶峭紅日薄侵  
羅綺嫩草芳抽碧玉茵媚柳輕拂黃金縷鶯囀上林  
魚遊春水 幾回欄杆遍倚又是一番新桃李佳人  
應怪歸遲梅粧淚洗鳳簫聲絕沉魚孤鴈望斷清波  
無雙鯉雲山千里寸心千里

清明 蝶戀花

春事闌珊芳草歇客裏風光又過清明節小院黃昏

人憶別落花處處聞鳴鴉  
咫尺江山分楚越目斷  
魂消應是清塵絕夢破五更心欲折角聲吹落梅花  
月

春暮

臨江仙

綠暗汀洲三月暮落花風靜帆收垂楊低應木蘭舟  
半篙春水滑一段夕陽愁  
潮水橋東回首處美人  
親上簾鉤青鷺無計入紅樓行雲歸楚岫飛夢到楊  
州

警悞

青玉案



人生南北如岐路世事悠悠等風絮造化小兒無定  
據翻來覆去倒橫直豎眼見都如許伊周事業何  
須慕不學淵明便歸去坎止流行隨所寓玉堂金馬  
竹籬茅舍總是無心處

梅花

孤鸞

天然標格是小萼堆紅芳姿挺白淡佇新粧淺點壽  
陽宮額東君想畱厚意倩年年與傳消息昨夜前邨  
雪裡有一枝先拆念故人何處水雲際縱驛使相  
逢難寄春色試問丹青手是恁生描得曉來一番雨

過更那堪數聲羌笛歸去和羹未晚勸行人休摘

勉學 木調歌頭

欲決聖狂路先明義利關須用潛心積累自得便居  
安晝夜陰陽相反內外主賓交戰欲盡理斯還勿欺  
爲要訣主一是真丹 嘆韶光如矢疾似波瀾此志  
平生惟篤頃刻未能閑仰止唐虞授受不過一言兩  
語斯盟今又寒猛將一簣土完成九仞山

賀建安富從古登仕榮旋陞任 喜遷鶯

英才超邁美奮志蕭曹功名照耀門第增輝山川騰

秀叨沐九重恩。涖江浙。曾施懷抱。憲臺游加。優賜對。  
秋光正。馬首榮旋。便之巴蜀。惟躍料。今去作政琴。  
堂方見。閭閻樂在。念民情挽回。淳俗方仗賢良。經畧。  
媲美召杜。聲價管取甘棠。畱却更期看。在楓宸寵特。  
行看喬擢。

雙湖先生文集卷之五

附錄

詩

咏玩易齋二首

吳覺  
遜齋

新安文獻首星源理學由來得聖傳  
洙泗波餘流考水天潢派演溢梅田明經院  
裡經文邃玩易齋中易學研父子顯承相著述  
後先赫奕頌鄉賢

其二

梅溪原是一山鄉  
挺出華宗衍慶長  
兄弟同登崇宦

業祖孫接武耀宗祊冠裳濟美儒風振橋梓崢嶸易  
學揚兩地書香渾翼聖明經世澤永流芳

咏玩易齋二首

胡 澣 安國

橋梓沉潛玩易齋予從隔嶺建浮橋若非祖德宗功  
茂何有鴛行鴈序排考水根源承李喬梅溪枝派出  
胡苗雖然地限分南北總屬明經一脉饒

其二

故址分來靡變遷巍科濟美已多賢元豐肇慶聲何  
赫景定重光譽更鮮不仕新君全令德惟宗四聖著

嘉言父詳子翼成通釋理學芳名奕世傳

送廷芳回梅溪二首

次焱 梅巖

故址勞君二月留談經問業兩綢繆祖先行耀開昌  
運父子謨謀顯壯猷腹蘊五車遵舊緒胸藏萬卷婉  
前修吾宗自是文風盛可竝明經祖澤優

其二

遠來書院究宗圖金玉流傳譽望符道脉千年來考  
水書香一派續梅湖承訪固知尊祖意款畱何有敬  
宗模慙慙未盡忙相別頻寄梅花不可無

又

斗元

勉齋

玉葉金枝本考川曾分一種到梅田明經道脉垂方  
策玩易工夫載簡編奕葉流芳光祖德雲仍繼美媿  
前賢儒宗自是名難朽只讓紫陽一着先

其二

偶承跋涉會宗盟風雨連床話更清剪韭春園聊獻  
酌燃燈夜雨便窮經君家註述舒懷抱儂輩荒疎解  
論評聚首未幾今速別梅花夢裡遠離情

送廷芳便歸聯句

二兄遠送意河殷

雙湖

只為離情弗忍分

柳巖此去

程途雖閒隔

勉齋

將來音問勿逡巡

柳巖

閒中務起

歸宗念

勉齋

忙裡當懷慕祖心

雙湖

惆悵誰能輕恕

別

柳巖

各逢驛使寄枝春

雙湖



文

祭雙湖先生文

陳

櫟

定宇

嗚呼儒者明經莫難於易先生家學易乃世習易百  
十家不輕所宗啓蒙本義獨宗晦翁晦翁十八以易  
薦鸚先生亦然可覩家學晦翁著書以身之退先生  
著書以耳之贖大肆其力幾絕韋編附錄纂疏海內  
廣傳玉齋爲父雙湖爲子啓蒙通釋竝傳濟美又以  
餘力明晦翁詩雖未拜讀以易可知晦翁忠臣先生  
其一纘祖明經孰能超右方壽斯文棟孔子堂訃音

忽傳有涕其旁嗚呼我侍先生自歲丁酉邇年以來  
罕得聚首泰山北斗心嘗仰懸自京南歸書問屢傳  
近者秋孟先生賜訪僅畱七日莫淹歸鞅期以秋季  
爲我再來許一月畱方賦歸哉僅辱遣賜一經堂記  
匆匆奉答尙邀再至十月下旬董君走件報君捐館  
臨歿寄聲欲託以孫來我家塾平生於人諾無敢宿  
蓋恐來春之官古荆尙俟商畧方報荔靈採漆之諾  
茲用掛劍表平生好將以薄奠嗚呼先生之壽垂及  
古稀先生之書千古昭垂乾坤若毀大易方已名

易俱可無憾矣吾文不文寫先生心先生如生真如  
來歆尙饗

序

送胡廷芳之武彞

董溪山

新安朱子昌平鄉永懷先壟封若堂當年歸來猶慊

慨吾家霜傑沾餘香

文公歸新安時有詩題霜傑集

星江西注湖山

傍菊潭之水何汪洋有書充棟仍撐腸考亭傳易心

勿忘掃除異說來歸疆太音在簞鏘璆琅出門一笑

天蒼蒼皎如日月懸中央微君喚醒醉夢場正途茫

茫孰知方百鳥群飛孤鳳翔六陰旣極回一陽不有

君子何能邦棟梁先叔人所望青堂燈火風露涼箋

詩夜半懸枕囊閩山空翠驅車箱文公精爽猶煌煌  
癡兒撰履戒治裝見道不離羹與牆強晞夜燎齊朝  
光臨岐送遠心徬徨

送胡廷芳歸新安

熊禾勿軒

城南謹太極寒泉參近思古人學道志千里焉得辭  
嵌嶺入閩錄泱泱遊湘詩恭惟紫陽翁跬步懷親慈  
親在望雲想親去廬墓悲往迹尙歷歷流風詎應微  
紫陽有學子綽綽醇儒姿手携圖象編來叩文公祠  
爲我匝月畱着意窺精微理象本一原體用非殊岐

精爽諒有廸煥然契淡期末流學易偏此語慎勿疑  
今晨出別語愴然叙心知家君授子學感子爲發揮  
母坐有雙湖築室吾將依願子說一語晨昏奉無違  
聞君陳大義臨分重含悽願惟雙湖象在易已具垂  
八卦各具體惟水獨兩之兩閒水爲月聖賢常取斯  
坎水與兌澤行止固有時說從止常得險與行相隨  
居原麗澤占講習相涵滋行觀海至德行空常持  
易道靜自悟動焉謹知幾乾坤胞與同幹蠱于咸空  
悠悠大化運勉勉前修追愧予望道邈願君鏡前馳

浩歌視融草遠送之武夷更挹寒泉潤注彼雙湖涯

送胡廷芳再入閩

李養吾

庭芳閩歸旣十有三載袖詩纂重來余道所聞以相  
叅伍或曰是於紫陽有異同去非得毋不可於意否  
曰項平甫趙履常早嘗登門晤解卓絕使成書上達  
決當蒙起予之褒碌碌常儔尋行數墨死在句下所  
謂一點一畫不出前人又謂轉般無餘但有所欠則  
其蔽且複然將焉取此近呂仲和以其大父德昭行  
述求銘內社倉一則如忠定所聞於汀守者忠定尊

敬文公甚至德昭豈樂畔師說者哉補之使不鐫以  
之使不渝門弟子職也事不相謀而相發或可充類  
試與去非商之

送胡廷芳東歸序

熊禾勿軒

記南渡初武夷文定胡公造行都有以程氏之學盛  
行爲言者公輒愀然曰吾方以程氏之學不行爲懼  
何謂盛行邪豈誦習其說者皆可以言程氏之學耶  
余讀書武夷山有胡君廷芳自新安携一編書來訪  
究其業蓋學自朱氏而尤粹於易畱山中三閱月相



與考訂推象數之源極義理之歸書成余已爲係語  
其後衆又復相與推究文公所論他經大旨重惟詩  
書二經訓義已具獨三禮通解猶未完書而春秋則  
僅發其旨要白鹿臨漳所刊尙有望於後之人余知  
非其任而竊有志焉春秋一經蓋竭精力者九年而  
藁本燼於丙子之厄俯仰十載學植荒落余交游多  
矣論經說理鮮有如君者何幸得因切磋究之相與  
纂述以成一家言豈非宇宙間一大快事乎胡君曰  
諾歸將考牒一經焉明年春當資糧武夷山中以畢

斯業噫道同千載若合符契志同千里若共肝膈天  
地茫茫徵人奚立徵道奚存今明經紫陽乃道南一  
大鄒魯也君之是行豈非斯文風氣之一會乎我日  
斯邁而月斯征君其勉之臨行復爲之躊躇却願溪  
有感於文定胡公之言而告之曰前之所云亦誦習  
其說而已文公沒且百年門人傳習寢益失真余以  
爲文公之學不行文公之道不傳也曩游浙中嘗因  
受業於敬堂劉先生得聞文公晚年所以與勉齋黃  
先生潛室陳先生論學之要旨然後乃知文公之學

其體全體其用大用與世之所言第以資誦說者固  
不同也誦說不可度也蓋必有以出乎其外者矣因  
我同志輒發其端君之學源於槃澗董先生江東文  
獻風流猶有足證其以吾言叅之殆有合乎否耶萬  
世道統自有真此學果有傳此道果有行豈惟生人  
之休天地當有賴焉君其勉之益勉之遂題以爲序  
且以告江東士君子之學自朱氏者

送胡廷芳後序

熊禾

勿軒

余與廷芳斯文異姓兄弟也三饒君矣君徃我來此

會豈數得君初來洪源三月再自洪源遊雲莊又十  
月今來龜峯已辦兩載畱計事有不得遂所期者豈  
斯文之會天實嗇我耶臨行含悵不忍別重念己丑  
與庭芳握手慨歎秦漢以下天下所以無善治者儒  
者無正學也儒者所以無正學者六經無完書也六  
經無完書則學不可得而講矣儒者無正學則道不  
可得而明矣千五百年牽補架漏天地生民何望焉  
考亭夫子集正學之大成平生精力在易四書詩僅  
完書開端而未及竟雖付之門人九峯蔡氏猶未大

暢厥旨三禮雖有通解缺而未補者尙多至門人勉齋黃氏信齋楊氏粗完喪祭二書而授受損益精意竟無能續之者春秋則不過發其大義而已豈無所俟於來學乎當吾世不完則亦愧負師訓多矣願雖兵亂之餘學徒解散文集燬亡徒抱苦心力實不逮蚤歲成春秋通解一書又厄於火兼以齒髮向衰扼我澌甚微君之來此學孤矣余與君相與講切縷指蓋十有七年易詩書僅爾就緒春秋更加重纂則皇帝王霸之道亦粗備矣惟三禮乃文公與門人三世

未了之書所關甚重且周官六典原未亡當復其舊而禮儀十七篇且欲各附記禮傳義以爲之兆當猶有俟也臨分再與庭芳約分任此責庭芳記以來歲冬春之交四入閩此畱當終吾生以畢茲事古襄張侯紹先嗜學禮士慨然以文獻爲念昔以此屬予今又以屬廷芳悠悠蓋壞文獻實難鄒孟子距夫子方百餘歲而已有無有乎爾之嘆者無其人也韓宣子因過魯見易象春秋遽曰周禮盡在是者有其書也君居江東與我同志其以是告之梅花祖道晴日暄

笑山中諸友各有贈詩余前日壽君之章意已至矣  
族長麟齋翁又申言之輒序其所深望者如此我日  
斯邁而月斯征載歌此爲續後序

周易翼傳序

溫陵 馮時來 開三

翼傳者雙湖胡先生崑爲發明本義啓蒙而著也曷  
謂翼示維敎也敎遠而馳緒散而紛翼也者峻其防  
而不使馳且紛焉故天位尊於統河漢滙於源統不  
一則節序差於濶餘源不定期脉絡淆於支流然則  
易之宗不明將大道亦荒於好逕昔者孔子學易至

三絕其韋編云必假數年而後可無大過夫易體至  
變而其用常不盡以夫子之聖猶不能遽自信於心  
如是矧欲以凡人有涯之識當之有白首而莫得其  
源已耳蓋至此而知先生之爲易慮者意深遠也夫  
易備於四聖人至紫陽氏而後哲於象占其閒苞陰  
陽之紀通天下之故類萬物之情舉凡否泰損益剛  
柔失得出處語默之空靡不畢呈於是又誰得以明  
且滅於其中者然而纂述易啓逕竇易開高明者或  
筌蹄於意象閤名者或望洋於幽渺蹈跡疑心迷宗



滯故甚至畏溺而并畏江河逃影而兼逃日月以輟  
適郢孰知其極此其于易固自爲欲舍筏而登岸不  
知其反墜於蹊也先生起於紫陽之後懼夫初旨之  
沒失其真也於是極深研幾遂以其居安玩占之餘  
著爲翼傳凡四篇凡夫圖極著衍之數靡不晰也卦  
爻詞變象占之說靡不究也古易變復以至焦京佺  
洞元苞經世之書靡不參互而考證也蓋揆幽抉奇  
誠可闡四聖人之秘而警夫世之瞶瞶者予少時旣  
已習聞其說恨不得是書而表章之幸承乏仙鄉私

淑孔通且堦是門者爲瑤圃余公震直青瑣著聲  
學素能闡揚斯志一日偕其裔孫烈徵錦熬出是津

而索序於余予因是而渙嘆先生之有功於易也其  
於紫陽之說毫無過佚乃其得於象占之外爲理之  
所未備者又足以啓人心於千百世之後而授之證  
合也彼劉牧之謬王弼之亂紛紛籍籍第未有以翼  
之故耳孟氏不云乎經正則庶民興夫正者翼之謂  
也惟翼而後可以反正惟反正而後可以起民邪慝  
而道有所托以不孤故風航駛駕猶假維檣將車行

塵尚資輻輔况夫一天後先之旨神化性命之宗而  
焚聞見多岐之途載馳以車駭爰以呂曷喻其愚故  
自有翼傳而紫陽氏之教吾意其若江淮行地而無  
極也是爲序

重刻周易翼傳序

余懋孳

瑤圃

周易翼傳者宋儒雙湖胡先生所述也先生後朱子  
百年而生同里其學以朱爲宗所云翼傳蓋因朱子  
之本義啓蒙而旁引博證以闡發之欲學者因啓蒙  
以通本義因本義以見四聖人此作書之大旨也古

今學易者多矣考辭尙象觀變玩占各因其所見以  
白爲方鮮能盡易而莫不足以見易糟粕煨燼無非  
易也而况訓故圖釋之者乎由周迄漢率先明象迨  
晉王弼尙明理而宋人因之程氏專言義理邵氏說  
去象數乃朱子獨以易爲卜筮之書且謂必見象數  
方可說理此於四聖人之易遠耶近耶竊嘗憶之易  
之作本於圖書者也圖書以理寓而以數示離數求  
之則所謂畫前有易者豈百姓日用所能窺而吉凶  
與民同患者將安所寄於聖人繫易之意幾乎晦矣

故傳易以朱氏爲近而本義啓蒙真不可無翼也自  
舉子業興易象置不解而鹵莽誇毗者動稱契象先  
窮繫表詆訓詁爲支離閒有慕子雲之玄亦鮮解其  
摘瑩玩象玩占學烏乎在第今析是編而詔之參考  
互證因數見理覺有實際不將爽然自失乎故翼傳  
者實讀易之司南尤後學之臧否也 愚未學易而從  
使閩見是編欣然嚮往惜字久而蝕幾不可讀會先  
生喬孫 烈觀光錦齋輩欲廣其傳屬余讐校遂不敢  
辭而僭題其簡端